

Txirritola

ARAMAIO / Barikua / 2003ko otsailaren 28a / 55. zenbakia

KOORDINATZAILEA: Ubane Madera • Otolara Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

Emakumeen Eguna ospatzeko ekimenak

UBANE MADERA

Martxoaren 8a badatorrela-eta, Itur Zuri elkarteak emakumeen aldeko egun berezi hori ospatzeko ekimenak antolatu ditu datozen egunotarako. Gaur, barikua, hasiko dira ekimenak, eta datorren barikuan (hilak 7) bukatuko dituzte, urteroko afariarekin, hain zuzen ere.

Urtero moduan, emakumearen aldeko eguna dela eta, hori gogorarazteko zenbait ekimen antolatu ditu Aramaioko Itur Zuri Emakume Elkarteak. Horrela, bada, gaur, barikua, Palestinaren gaineko hitzaldia izango da, 18:30ean, Aramaioko kultura etxean. Hain zuzen ere, Komite Internazionalistetako kide Amaia Arrizabalaga arrasatearrak emango du Palestinako egoera

latzaren berri.

Gero, martitzenean segituko dute ekitaldiek. Egun horretan Gozogintza ikastaroa egingo dute eskolako jangelan. Itziar Aspe sukaldari aramaioarrak pare bat postre egingo ditu, jendeari erakusteko, eta, jakina, gero guztien artean probatzeko. 18:30ean izango da ikastaroa.

BINGOA ETA AFARIA

Eguenean, berriz, filma emango dute kultura etxean (filma oraindik zehaztu barik dute). Baina lehenago, kafea hartzeko aukera egongo da. Hori guztiori 18:30ean hasiko da.

Eta, ekimenekin bukatzeko, martxoaren 7an, barikua, ohiko afaria egingo dute. San Martin Eskolako jangelan izango da, 20:30ak inguruan. Edozelan ere, hori baino lehen, bingoa antolatu du Itur Zuri elkarteak. Hortaz, bingoan parte hartu gura duenak 19:00etan egon beharko du eskolako jangelan.

Esan beharrik ez dago emakumearen aldeko egunean antolatutako ekimenak izan arren edozeinek har dezakeela parte gura duen tokian. Are gehiago, Itur Zuri elkarteak aramaioar guztiak gonbidatzen ditu ekimenean parte hartzera.



ARTXIBOA

Datorren barikuan, hilaren 7an, bingoa eta afaria egongo dira, gura duenarendako.

Lan gutxiago baina kalitate onekoak Ipuin Lehiaketan

Zapatuan egin zuten Txirritola Euskara Elkarteak antolatutako II. Ipuin Lehiaketaren sari banaketa. Iaz baino lan gutxiago aurkeztu dituzte, baina, epaimahai-kideen esanetan, idatzien kalitateak ez du behera egin. Hain justu ere, txikienen mailakoek erakutsi dute aurten kalitaterik onena.

Hori bai, emateko zeuden sei sarietatik bost bakarrik eman zituen epaimahaiak. Izan ere, DBHko lehenengo mailakoek aurkeztutako lanek ez zuten oso maila onik eta, horregatik, hutsik utzi dute maila horretako lehenengo saria.

Rosa Mondragónek, Divina

Arriolabengoak eta Xabier Agirrek osatu dute epaimahaia.

IRABAZLEAK

Kontuak kontu, beste bost sari eman zituen Txirritola Euskara Elkarteak: Lehen Hezkuntzako bigarren ziklokoan, Ane Herizek irabazi zuen; eta Nerea Azurmendi geratu zen bigarren.

Lehen Hezkuntzako hirugarren zikloan, berriz, Beatriz Azurmendik irabazi zuen eta Igor Oianguerenek eskuratu zuen bigarren saria. Eta, esan bezala, DBHko lehenengo ziklokoen artean ez zen aurreneko saririk izan; bai, ordea, bigarrena: Iraia Bei-

tiak irabazi zuen hori.


BALORAZIOA

Txirritola Euskara Elkarteak pozik dago Ipuin Lehiaketan lortutako parte-hartzearekin eta emaitzekin, baina aurrera begira aldatetako egitekotan dabil. Izan ere, orain, Derrigorrezko Bigarren Hezkuntzara artekoek bakarrik aurkez ditzakete lehiaketarako ipuinak; horren ondorioz, normalean antzerako adineko jende gaztea aurkeztu ohi da. Txirritola elkarteak, berriz, nagusiagoei ere eman gura die Ipuin Lehiaketan parte hartzeko aukera. Datorren urtean izango da hori.



Berriro ere argi barik, haizearengatik

Berriro ere haizea protagonista izan da oraingo astean Aramaion. Astelehen gauean, oso haize zakar eta bortitza ibili zen, eta kalteak egin zituen herrian. Horrela, martitzenean 15 orduz argi barik geratu zen Aramaio. Berriro ere Gellao inguruan pinuren bat bota zuen haizeak eta pinuak, era berean, goi tentsio hariak bota zituen. Aurrekoan moduan, oraingoan ere esan beharra dago gertatukoaren arduraduna Iberdrola dela, eta ez Udala. Horrez gainera, Kurtzetarako bidea ere itxita egon zen goizean, han ere beste zuhaitz bat bota zuen-eta haize zakarrak.



Sari banaketa zapatu eguerdian izan zen, kultura etxean.

TELEFONO JAKINGARRIAK

OSASUNA / LARRIALDIK

Osasun etxea (txandak)	945 44 53 40
Botika	945 44 50 03
Udaletxea	945 44 50 16
Ertzaintza (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxia eta autobusak	945 44 50 33
Udal kiroldegia	945 44 53 35
Postetxea	945 44 50 83
Zulako Eskualdea	945 43 01 67
Suhiltzaileak (Zubillaga)	943 78 28 00

AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00	10:15**	
11:00	11:15	
12:00	12:15**	13:00
15:15	15:30	16:15
17:20	17:35	
18:30	18:45**	
20:30	20:45	21:05
21:10	21:25**	

GASTEIZ	ARAMAIO	ARRASATE
	07:50	08:05
08:20	09:00	09:15
	10:15*	10:30
	11:15	11:30
13:10	13:45	14:10
16:20	17:00	17:20
	17:35	17:50
	18:45*	19:00
19:30	20:10	20:00

OHARRA: Izartxoaren duten orduetan eskaeraren arabera zerbitzua eskaintzen dute. Eta bi izartxo dutenetan, auzoetara joateko garraioa izango da. Eskaeraren arabera autobusa erabili gura duenak, bezperan deitu beharko du honako zenbakira: 629 54 59 23

OHARRAK

ARETO FUTBOLA

Nesken taldeak, geroago eta hobeto jokatzen ibili arren, ez du irabazterik lortu Lan eta Jolas taldearen aurka; izan ere, 4-3 galdu zuten joan den asteburuan. Kadete mailako mutilak, ordea, garaipenarekin itzuli ziren herrira. 3-4 irabazi zioten Lan eta Jolasi. Bihar, zapatua, Bañerako neskek Club Deportivo Aurrera taldea izango dute aurrez aurre, 11:00etan, Aldabe kiroldegian. Kadete mailako mutilek, berriz, atsedenaldia izango dute. Eta gazte mailakoek Urgatzi taldearen kontra jokatu beharko dute, 11:30ean, Gasteizko Europa kiroldegian. Esan beharra dago, era berean, oraingo asteburuko partidua ligako azkena izango dela gazte mailako mutilendako. Partidu horren arabera, azkeneko lekuan edo azkenurrekoan geratuko dira. Bestalde, hemendik aurrera Kopa Txapelketan hasiko dira jokatzen.

ZINEA

Dos colgaos en Chicago filma emango dute domekan.

JAIK

Barikuan, zapatuan eta martitzenean, Aratusteak Aramaion

Gaur (barikua) hasi eta datorren martitzenera arte Aratusteekin lotutako ospakizunak izango dira Aramaion. Gaur, eskolako Haur Hezkuntzakoak irtengo dira moztortuta. Eta bihar, Mozorro Lehiketa izango da. 17:30ean, kalejira irtengo da kiroldegitik eta 18:00etan sari banaketa izango da plazan. Horren ostean, txokolatea banatuko dute herritarren artean.

Eta martitzenean, berrito ere gaztetxoeren txanda izango da. 14:00-14:30ak bitartean moztortuta jantziko dute umeek eskolan eta gero, trikilariek lagunduta kalejira joango dira plazara. Han jolasak eta dantzak egingo dituzte eta gero, berrito ere eskolara bueltatuko dira; izan ere, 15:30ean, txokolatea emango diete. Horrez gain, 17:00etan, txotxongiloak izango dira plazan. *Nori berea, itsasoren legea* izeneko ikuskizuna egingo dute. Bereziki, 3 eta 10 urte bitarteko umei dago zuzenduta txotxongiloen saioa.



BOTEPRONTOAN/ Gorka Arias Elexalde · Anboto tabernakoa

“Inportanteena da jendeari zerbait desberdina ikusteko aukera ematen zaiola”

Gorka Arias Elexalde da oraingo asteko gure berba-laguna. Anboto tabernaren gidaria da joan den uztailaz geroztik. Eta igarri da, bai, haren etorrera. Besteak beste, tabernan kontzertuak antolatzen hasi da, eta horrek eragin du aldaketarik, batez ere, Bizente Goikoetxea plazako giroan:

Lehenago ere tabernari izandakoa zara?

Ez, sekula ibili barik nengoen. **Eta zelatan etorri zara tabernara?**

Aspalditik buruan sartuta neukan taberna baten lan egin gura nuela; akaso, herrian girorik ez zegoela ikusten nuelako-edo. Pentsatzen nuen neuk taberna bat hartuz gero jakingo nukeela zer falta den, jendeak zer gura duen. Azken baten, jendeak nik gura nuela gura zuen. Eta ikusten dut jendea gustura dagoela orain: musikarengatik...

Zeu ere gustura zaude?

Apur bat desberdina izan da. Hau da, horrelako negozio baten hasten zarenean, hasieran ordu asko sartu behar izaten dira; eta alde horretatik apur bat estututa ibili naiz. Baina jende askok esan dit pozik dagoela; hortaz... Aldaketa asko ere egin ditugu.



“Uste nuen neuk taberna bat hartuz gero jakingo nukeela zer falta den, jendeak zer gura duen”

Orain, adibidez, erakusketak egiten hasi gara.

Bai, ala?

Bai. Zapatuan ekarri zuten. Juan González Cuesta bergararrak egindako margolanak dira. Hilabetez egongo dira hemen, gura duenak ikus eta eros ditzan. Eta gero, beste margolariren bat ekarriko dugu, edo eskulturagileren bat...

Hortaz, zuretako taberna kultura bultzatzeko beste modu bat da, ezta?

Bai. Aramaion beti egin izan dira gauzak, baina, bestelako herri txikietan moduan, gauza kulturalak jaietan eta egun zehatzetan bakarrik egoten dira. Eta hau beste zerbait da. Jendeak gauza berriak ikusten ditu... Eta hori da inportanteena, jendeari gauzak ikusteko aukera ematen zaiola.

Eta, horrez gain, artelanak

eta horrelakoak egiten dituenak ere hementxe du erakusteko lekua. Jende guztia ezin da galerietan-eta ibili, eta horien lanak ikusteko lekuak egotea ere ondo dago.

Kontzertuekin ere taberna eza-gunago egingo zen, ezta?

Bai, jendeak berba egiten du... Arrasate ere oso gertu dago eta handik ere etortzen hasi da jendea. Jende askok du Anboto tabernaren berri, eta seguru asko kontzertuei esker izango da.

Eta zelako giroa sortu da?

Jende gehiago etortzen da; lehen, plaza inguruan ez zen jende askorik ibiltzen eta orain, gehiago dabil. Gauean ere oso giro ona egoten da. Adibidez, joan den asteburua gogor samarra izan da...

Zer edaten da gehiago, kubatak ala kalimotxoak?

Kalimotxoak edaten dira, baina gutxi. Gehien garagardoa edaten da, eta kubatak eta horrelakoak gauean edo asteburuan. **Zela definituko zenuke Anboto?** Niretako negozio bat da, baina jendeak gura duen moduan ipintzen ahalegindu naiz. Jokek ere ipini ditut (billarra), kontzertuak... Eta seguru apurka-apurka gauza gehiago sortuko direla.

KIROLA

Paleta Txapelketaren finalerdietarako sailkapena jokoan dago

Dagoeneko Paleta Txapelketako bosgarren jardunaldia jokatu dute, eta, geroago eta gertuago dago txapelketako finalerdia. Hain zuzen ere, dagoeneko Pérez eta Urrak osatutako bikoteak lortu du sailkatzea, orain arteko partidua guztiak irabazi dituzte-eta. Jokatzen ari diren beste lau bikote hiru partidua irabazi dituzte: Garaitak eta Floresek; Barandiaran II.ak eta Errastik; Abarrategik eta Ballinak; eta Barandiaran I.ak eta Oiangurennek.

Eta Arriolabengoak eta Azurmendik bi partidua irabazi dituzte.

Finalerdietarako bi aste gertzen dira, eta guztira lau bikote sailkatu behar dira. Emaitzak ikusita, hiru eta bi partidua irabazi dituzten bikoteek dituzte sailkatzeko aukerarik gehien.

Oraingo asteburuan ere partidua jokatu dituzte kiroldegian, zapatu eta domeka goizean.